

曾文正公奏稿

第三函
第六冊

曾文正公奏稿

卷之十六目錄

克復太平蕪湖兩城摺

同治元年五月初三日

議覆王慶雲漕督兼巡撫原奏片

派員辦廣東釐金片

官軍水陸並進疊克要隘駐軍雨花台摺

五月十七日

參革陳由立等摺

全日

查覆馮子材兵勇滋鬧情形片

近日軍情片

鮑超軍進攻甯郡勦平逆壘摺

五月十九日

黃翼升署江南提督片

五月二十七日

謝弟國荃優敘貞幹勇號 恩摺

六月初六日

議覆兼攝通商大臣摺

近日軍情片

議覆調印度兵助剿摺

六月二十二日

近日軍情片

江西被害州縣蠲免錢漕分數摺

七月初二日

金陵陸師勝仗張勝祿請卹摺

全日

克復甯國府城摺

全日

懇豁免江西歷案攤捐款項片

童容海投誠片

巡撫李續宜聞訃丁憂摺

七月初十日

近日軍情片

代奏李續宜謝恩摺

七月二十一日

查上次摺片並報近日軍情片

奉旨垂詢各路軍情分條覆奏摺

八月十二日

籌辦廣德受降事宜分別遣畱摺

全日

近日軍情片

覆陳河南募勇另派統領片

查覆嚴樹森被參各情摺

八月二十九日

查覆何桂清退守情形摺

全日

查覆薛煥吳煦參款片

近日軍情片

唐訓方駐紮臨淮摺

閏八月十二日

請簡親信大臣會辦軍務片

克復太平蕪湖兩城摺

同治元年五月初三日

奏爲水陸各軍渡江夾剿克復太平府城蕪湖縣城並克金柱關東梁山各要隘恭摺馳陳仰祈

聖鑒事竊自逆匪竄踞金陵以蕪湖爲屏障以東西梁山爲鎖鑰尤以金柱關之僞城爲關鍵官軍旣克北岸之西梁山賊於南岸三處防守尤嚴臣玉麟與曾國荃定計必從金柱關入手則蕪湖與金陵老巢橫中截斷賊勢乃孤遂飭總兵李成謀於四月初五日會督各營師船由鍼魚嘴駛進采石磯江口焚船毀壘率勇登岸突薄金柱關僞城萬礮轟擊幾將得手以東梁山賊援大至整隊而還臣等知該處地險城堅非水陸併攻不

能制賊死命乃將上游水師悉調赴裕溪口以下二十日曾國荃率馬步十五營自西梁山駕舟南渡近逼金柱關下沿隄結營臣玉麟恐築壘未固賊將擾我陸師乃派李朝斌帶外江新右營暨喻俊明任星元王吉內河水師三營從上游奮攻以躡賊後派成發翔鄧萬林內河左右營暨王明山萬化林郭明鼐唐學發外江水師四營黃翼升陽利見陳東友張元龍成俞卿楊宏勝王東華蔡東祥淮揚水師八營從下游環擊以遏賊前曾國荃立營既定料金柱關之賊有水軍牽制不暇顧及太平府一路乃率各營哨潛分隊伍捲旂疾馳遙望賊在北門修卡立即揮軍掩襲斬卡突進賊方駭走入城閉關不及我軍擁進

北門羣逆狂奔驅出南門截殺三百餘級遂復府城蓋賊不料官軍越蕪湖而先攻金柱關尤不料甫抵金柱遽襲郡城此四月二十日克復太平府城之情形也是夜水師眾營輪攻金柱關並未收隊二十一日王明山率外江四營先赴下游鉞魚嘴一帶臣玉麟親率成發翔李朝斌任星元王吉張元龍等循隄周視布壘若垤中峙僞城雄亘數里未易猝攻旋又瞭見曾國荃一軍已繞出三汊河上駟渡對河而陣鏖戰方酣遂相率還營分水師爲三隊以一隊守定江路以一隊衝入內河直逼塔下以一隊輦礮登陸環城壘而轟牆圯棟折屋瓦皆飛賊亦矢石如雨蔽空而下時近夜分黃翼升李朝斌成發翔束草爲炬

指麾督戰陽利見王吉帶同弁勇蛇行而進將越濠溝外委王有章中槍殞命眾軍愈戰愈奮羣以火箭飛射西門哨樓賊於烈燄中衝突而出各水勇躍上隄埂短兵擊刺積骸滿渠卽時攻復金柱關而分撥黃翼升成發翔賴榮光蔡東祥張光泰王東華楊宏勝張元龍等數營乘風上駛往襲東梁山時值曾國荃陸軍擊退內河西岸之賊引軍來助甫將僞城及三汊河上駟渡數十壘一律毀平獲大礮二百七十餘尊旂幟刀矛萬餘件而謀者又報東梁山經黃翼升成發翔等一戰而下已移軍進次蕪湖此二十一日連克金柱關東梁山之情形也先是蕪湖賊目陳星斗沈國萬陳太和黃品來等經選用同知曾貞幹

密令黃潤昌設法招撫本有大兵臨境舉眾內應之約至是金柱關東梁山相繼攻拔蕪賊已成孤注正可乘其自疑而圖之二十二日曾貞幹自率所部將領及周萬倬劉祥勝新後祥後等軍循江而進偪壘立營並會商李成謀決開隄岸駛入小划四面合圍適黃翼升成發翔所統淮揚內河各水師自金柱關乘勝飛槩而來萬礮同轟聲震天半羣賊內亂棄壘潰奔圍而殺之幾無脫者城賊惶懼失措悉向官陡門濮家店而逸維時曾國荃親督部隊躡賊至戴橋地方聞蕪湖已復揣該縣逸出之賊必折竄而東一面令彭毓橘設伏於薛鎮渡口一面以輕騎追及於賈家灣乘賊半濟突起奮截殺斃甚夥生擒近二百

名賊乃轉走護駕墩掠舟偷渡李朝斌帶各哨舢板自小花津橫出截之薄暮鏖戰至三更水師傷亡甚多李朝斌不冒稍退比及黎明賊趨薛鎮渡口適爲彭毓橘伏兵所敗除殲斃溺斃外生擒至七百五十餘名之多釋放面有刺字者餘皆駢誅黃翼升擊賊於清水河俘馘亦以千計蕪湖東梁賊黨漏網無幾此二十二日克復蕪湖縣城並追賊疊勝之情形也王明山所帶四營之赴鍼魚嘴者二十二日抵烏江鎮該鎮對岸有烈山石壘二座斜對九洑洲爲犄角之勢王明山帶各船渡江逼壘攻擊逾時壘中旗亂我師各船分泊上下兩岸俟賊出壘登岸截擊擒斬無算立破堅卡其九洑洲之上面又有大勝關賊壘

一座礮船護之王明山環攻逆壘未遽得手萬化林將江中賊船全行焚燬壘賊大震奪路狂奔我軍四面蹙之剗平逆壘奪獲鎗礮極多此又王明山等攻克太平以下兩卡之情形也臣等伏查太平府屬莫要於蕪湖一城尤莫重於金柱關一隘自攻奪此關未逾三日上下名城要隘悉爲我有從此全局一振上而甯國下而金陵均有可乘之機除曾國荃曾貞幹不敢仰邀議敘外此次尤爲出力之員相應繕具清單籲懇

恩施以昭激勸陣亡各將弁俟查明另單請卹其餘在事出力員弁兵勇可否容臣等查明奏獎之處恭候

訓示遵行所有水陸官軍連克府縣兩城沿江各要隘緣由謹

會同大學士湖廣督臣官文安徽巡撫臣李續宜恭摺由驛六

百里具奏伏乞

皇上聖鑒訓示謹

奏

議覆王慶雲漕督兼巡撫原奏片

同治元年五月初三日

再臣承准議政王軍機大臣字寄同治元年二月二十三日奉
上諭據王慶雲奏江北地當衝要現在督撫分駐鞭長莫及請
就近暫歸漕運總督辦理一摺據稱自蘇常失陷巡撫以下駐
紮上海偏隅與江北各屬道途中梗而守令之升調與夫錢穀
刑名仍須稟詳江蘇巡撫覈辦輾轉需時其公事之棘手不問
可知曾國藩統領全師兼顧浙皖恐不暇注意地方都興阿等
運籌軍務於吏治民生亦無暇講求守令功過不明何以整頓
地方保衛完善現在南糧未能挽運漕運總督公事無多請頒
給敕書令其巡撫江甯布政司所屬地方仍兼辦全漕事務並

於各屬適中之地設爲省會將江甯藩司暫移江北兩淮運司兼辦江北刑名驛傳事件與漕督藩司同駐一城地方公務均歸漕督辦理無須復歸江蘇統轄等語著曾國藩都興阿體察情形悉心會議具奏原摺著鈔給閱看等因欽此臣查王慶雲所奏尙係咸豐十年蘇常初失時情形至十一年春聞上海粗定江北各屬與巡撫衙門文報常通紀綱漸立逮安慶克復以後蘇省官紳紛紛來臣處請兵設立水驛專用輪船遞送文書往返不過旬日李鴻章抵滬以來聲息不隔呼應尤靈凡總督衙門應辦事件臣儘可照常管理未敢將地方公務概行廢閣臣於上年十一月二十五日覆奏摺內卽建議巡撫宜駐鎮江

欽奉

諭旨俞允嗣因蘇人以重價雇船來迎李鴻章先赴上海以答輿情俟料理就緒卽當速移鎮江以符原議論江蘇之幅員蘇州偏於南隅淮安偏於北隅惟鎮江居適中之地而又扼形勝之區於軍務地方兩者俱可攬其全綱自應仍照舊制責成新任撫臣李鴻章統籌兼顧溯查咸豐四年皖江南北賊氛中斷廷臣請設皖南巡撫部議以窒礙而未行該尙書王慶雲請改漕督爲江北巡撫另設省會之處事同一律應請毋庸置議所有遵

旨會議緣由謹會同江甯將軍臣都興阿附片覆陳伏乞

皇上聖鑒謹

奏